

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U
TUZLI
Broj: 32 0 St 460796 24 St
Tuzla, 17.05.2024. godine

Općinski sud u Tuzli, sudija Antonela Đaković, u postupku prethodnog ispitivanja prijedloga za otvaranje stečajnog postupka nad dužnikom „DEA KOMERC“ d.o.o za trgovinu i promet Tuzla, ul. Ismeta Mujezinovića br.6, Tuzla, dana 17.05.2024.godine donio je slijedeće:

R J E Š E N J E

POKREĆE SE PRETHODNI POSTUPAK radi utvrđivanja uslova za otvaranje stečajnog postupka nad imovinom dužnika „DEA KOMERC“ d.o.o za trgovinu i promet Tuzla, ul. Ismeta Mujezinovića br.6, **MBS: 1-6899**.

Za privremenog stečajnog upravnika imenuje se Osman Šećerović iz Tuzle, ul. Franje Markovića br. 8, Tuzla.

Privremeni stečajni upravnik dužan je odmah po prijemu rješenja o imenovanju preduzeti radnje utvrđene odredbom člana 63. Zakona o stečaju FBiH (Službene novine FBiH br. 53/21), a naročito:

- obezbijediti imovinu dužnika i starati se o istoj,
- ima ovlašćenja da uđe u poslovne prostorije dužnik i provede neophodne radnje,
- utvrditi da li postoji razlog za otvaranje stečajnog postupka,
- ispitati da li će imovina stečajnog dužnika pokriti troškove stečajnog postupka,
- utvrditi da li se poslovanje stečajnog dužnika može u cjelini ili djelimično nastaviti u toku prethodnog postupka
- uraditi kontrolu poslovanja stečajnog dužnika
- kada je podnosilac prijedloga za otvaranje stečajnog postupka stečajni dužnik, dostaviti izjašnjenje da li je stečajni dužnik, odnosno organ ovlašten za zastupanje stečajnog dužnika podnio prijedlog za otvaranje stečajnog postupka u roku od 60 dana od dana nastupanja platežne nesposobnosti.

Privremeni stečajni upravnik dužan je podnijeti svoj pismeni izvještaj ovom sudu u roku od 30 dana od dana donošenja ovog rješenja u kome će izvijestiti ovaj sud o preduzetim radnjama i iznijeti svoje stručno mišljenje o tome da li postoje razlozi za otvaranje stečajnog postupka, odnosno da li postoje bilo kakvi izgledi za nastavak daljeg poslovanja dužnika.

Mjere pojedinačnog prinudnog izvršenja pokrenute protiv stečajnog dužnika se obustavljaju, izlučna i razlučna prava povjerioci ne mogu ostvariti u predhodnom postupku, stečajni dužnik ne može raspolagati budućom stečajnom masom bez saglasnosti privremenog stečajnog upravnika i suda, a sve to u cilju osiguranja buduće stečajne mase.

Rješenje će biti objavljeno u „Službenim novinama FBiH“, web stranici Općinskog suda u Tuzli i na Internet stranici FIA-e te se pozivaju povjerioci da privremenom stečajnom upravniku bez odlaganja dostave prijedlog mjera osiguranja na predmetima stečajnog dužnika koje će eventualno zahtijevati.

Ovo rješenje će se dostaviti Odjeljenju registra ovog Suda, Zemljišno-knjižnom uredu Općinskog suda u Tuzli i Službi za urbanizam, stambeno-komunalne, imovinsko-pravne i geodetske poslove Grada Tuzla, radi upisa zabilježbe otvaranja prethodnog stečajnog postupka.

O b r a z l o ž e n j e

Predlagač „DEA KOMERC“ d.o.o za trgovinu i promet Tuzla, podnio je ovom sudu dana 28.02.2024.godine prijedlog za otvaranje likvidacionog postupka nad navedenim pravnim subjektom zbog nepostojanja ekonomskih uvjeta za poslovanje istog. Uz prijedlog je priložena sva potrebna dokumentacija zbog platežne nesposobnosti dužnika jer društvo nije u stanju izvršavati potraživane i dospjele obaveze u dužem vremenskom periodu.

Na ročište za saslušanje dužnika pristupio je zakonski zastupnik predlagača Nusret Salković koji je izjavio da je podnio prijedlog za likvidaciju društva, međutim kako društvo nema imovine (pokretne ili nepokretne, niti stalnih sredstava) kao ni obaveza prema Poreznoj upravi F BiH po osnovu javnih prihoda i prema Upravi za indirektno oporezivanje po osnovu PDV-a, ali ima obaveze prema dobavljačima zbog čega je poslovnom subjektu i blokiran račun društva 2012.godine. Kako društvo nije više solventno da izmiri obaveze zastupnik predlagača je predložio da sud prijedlog za pokretanje likvidacionog postupka smatra prijedlogom za otvaranje stečajnog postupka, jer smatra da su ispunjeni zakonski uvjeti za otvaranje stečaja. Račun društva otvoren kod Raiffeisen Banke je blokiran od 22.03.2012.godine. Zakonski zastupnik predlagača je predložio da sud odredi predujam radi pokretanja prethodnog postupka, a kasnije stečajnog postupka.

U postupku ocjene osnovanosti prijedloga za pokretanje stečajnog postupka sud je ocijenio da je neophodno provesti prethodni postupak kako bi mogao odlučiti o osnovanosti prijedloga. Stečajni sudija nakon što je utvrdio da je prijedlog za pokretanje stečajnog postupka podnesen od strane ovlaštenog predlagača i da je isti dopušten u smislu odredbe člana 58. stav 2. i 13. Zakona o stečaju postupku, dana 29.04.2024.godine rješenjem naložio predlagaču da uplati novčana sredstva na ime predujma finansiranja troškova prethodnog postupka radi utvrđivanja uslova otvaranja stečajnog postupka. Predlagač je dana 09.05.2024.godine dostavio dokaz o uplati iznosa od 3.000,00 KM na ime troškova finansiranja prethodnog stečajnog postupka.

Imajući u vidu dostavljenu dokumentaciju i izjavu zakonskog zastupnika dužnika na ročištu za saslušanje, sud nije u mogućnosti da sam procijeni postojanje svih neophodnih uslova koje Zakon predviđa za otvaranje stečajnog postupka, te se donosi rješenje o pokretanju prethodnog postupka radi utvrđivanja uslova za otvaranje stečajnog postupka nad dužnikom, temeljem odredbe člana 61. stav 1. Zakona o stečaju („Sl. novine F BiH“, br.53/2021.).Odluka iz stava 3. ovog rješenja donesena je temeljem odredbe člana 63. Zakona o stečaju, a nakon što je utvrđeno da privremeni stečajni upravnik ispunjava uslove za imenovanje utvrđene odredbom člana 71. Zakona o stečaju.

Na osnovu navedenog, temeljem citiranih odredbi zakona, sud je odlučio kao u izreci rješenja.

SUDIJA
Antonela Đaković

POUKA O PRAVNOM LIJEKU: Protiv ovog rješenja dozvoljena je žalba u roku od 8 (osam) dana, od dana objavljivanja rješenja u Službenim novinama F BiH. Žalbu mogu uložiti stečajni

dužnik i privremeni stečajni upravnik. Žalba se podnosi Kantonalnom sudu u Tuzli putem ovog Suda.